



Sesida dals

2 da mars 2021

Communitgà ils

3 da mars 2021

Protocol nr.

192/2021

Dumonda Caviezel (Tavau Clavadel)

concernent la renconuschientscha d'entradas pli pitschnas / da custs supplementars
COVID-19

Resposta da la Regenza

Tar la dumonda 1: La soluziun dal chantun Grischun da surpigliar tut ils retgavs da las assicuranzas socialas e dal maun public che mancan cumpareglià cun l'onn precedent, e quai tant per las prestaziuns staziunaras sco er per las prestaziuns ambulantas, independentamain sch'i sa tracta da pazientas e pazients chantunals u extrachantunals, è – cumpareglià cun auters chantuns – fitg generusa. En blers chantuns na datti nagin sustegn specific per ils ospitals. Tar las perditas d'entradas en il sector da las personas assicuradas supplementarmain èsi da resguardar che la part da l'assicuranza da basa e la part dal maun public èn er vegnidas surpigliadas. Mo las prestaziuns da l'assicuranza supplementara per in confort pli grond da las pazientas e dals pazients e per ils onuraris supplementars da las medias e dals medis tractants n'èn betg vegnidas cuvridas qua. Quests retgavs ed ils retgavs da las pajadras e dals pajaders autonoms tutgan – tenor l'avis da la Regenza – tar la ristga d'interpresa dals ospitals, resp. en il cas dals onuraris tar la ristga da las medias e dals medis tractants. Correspudentamain na ston quels betg vegnir garantids dal maun public cun daners da taglia. Ultra da quai chaschunass la surpigliada da questas perditas da retgavs in tractament inegal fitg grond tranter ils ospitals, cunquai che la quota da pazientas e pazients assicurads supplementarmain divergescha da stgars 10 fin quasi 30 pertschient.

Tar la dumonda 2: Eventuals custs supplementars ch'ils ospitals han gì durant la pandemia da COVID-19 pervia da prescripziuns d'igièna pli severas, pervia d'andaments engrevgiads e.u.v., han pudì vegnir mess a quint al chantun sco prestaziuns d'utilitad publica supplementaras. En il sector da las prestaziuns ambulantas per pazientas e pazients cun ina malsogna da COVID-19 è il catalog da las tariffas da Tarmed vegnì adattà correspudentamain. Cun quai èn cuvrìds ils custs supplementars che resultan dal tractament da pazientas e pazients da COVID-19. In deficit explicit n'è qua betg visibel.

Tar la dumonda 3: I vegn differenzià tranter apparats da la tecnica medicinala ch'èn vegnìds acquistads durant la pandemia da COVID-19 e che na pon betg pli vegnir duvrads, cur che la pandemia è passada, resp. che ston vegnir depositads fin ad in'eventuala nova pandemia, ed apparats che vegnan duvrads suenter la fin da la pandemia per remplazzar apparats ch'eran gia avant maun avant la pandemia. En l'emprim cas vegn acceptà e surpiglià il pretsch da cumpra cumplain, en il segund cas mo ils custs da l'amortisaziun per la durada da la pandemia da COVID-19.



En num da la Regenza

Il president:

Dr. Mario Cavigelli

Il chancelier:

Daniel Spadin